

**■ COLUMNA**

# En gir en il Giura

DA CHATRINA JOSTY\*

**D**a mes agen temp da scola m'è restà coga pauc. Ina chaussa hai jau dentant anc en buna memoria ed uss hai jau finalmain savì «duvrar» ella.

**C**lassa: 7avla – rom: geografia svizra, tura da velo tras il Giura – onn: 1997.

**J**au na sai betg co che noss scolast è quella giada vegnì sin l'idea da far ina tura da velo tras il Giura. Forsa perquai ch'el aveva ina fascinaziun per lieus pauc populads. Tranter auter era per la Sibiria. Jau ma regord che nus avain stuì emprender ordadora ils flums e las citads da tut la Russia.

**E**sa chapescha era tut ils pass svizzers.

**L**a geografia svizra n'era però betg mo in fatg sitg, mabain er in'esperienza fisica ed uschia è tut il stgalim aut da Bravuogn viaggià vers vest e davent da la chapitala dal chantun Giura Delémont cun il velo enfin a La Chaux-de-Fonds, en il Giura neuschatelais.

**U**ss ch'jau abitesch blier pli damanaivel da



quests lieus hai jau in bel di prendì il velo da cursa e sun ida sin ils fastizs da questa tura da velo dal 1997. La ruta precisa na savev'jau betg pli, ma il Giura hai jau scuvert danovamain.

**P**er fortuna hai jau survegñ in pèr buns tips avant che partir. Per exempel quest: En il Giura èsi adina d'avantatg sch'ins prenda cun sai insatge da mangiar. Ins passa bain tras vischnancas e speravia ad ustarias, ma questas èn savens serradas. E lura na dastg'ins betg far quint ch'il Giura saja tut plat ed ir cun velo mo patgific. Mes scolast m'è vegnì endament: Sin nossa tura da velo ha el stuì stumplar savens ses velo da trais girs.

**B**etg per nagut – la citad da La Chaux-de-Fonds è sin bunamain 1000 meters sur mar! Interessant è

co ch'ella è construida: En in muster da schach à l'americana. Quai savev'jau anc da la tura da velo sco scolara. Jau aveva però emblidà che La-Chaux-de-Fonds n'è betg propi in bijoux sin l'emprim'egliada. Ils megliers temps da la citad dad uras paran dad esser passads. E tuttina, ella tutga dapi il 2009 tar il patrimoni cultural mundial da l'Unesco ed i vala la paina da visitar ella cunzunt pervi dal cuntrast cun autras citads svizras.

**Q**uest cuntrast vegn anc pli visibel sch'ins fa il viadi vinavant sur il pass dal Vue des Alpes che collia La Chaux-de-Fonds cun'in altra citad interessanta.

**S**ch'ins passa sur il Vue des Alpes riv'ins numnadamain a N...? Stgisai, jau sun halt era scolasta. Googlar è scumandà.

**V**egnì e faschai sez in gir tras las collinas dal Giura! Quai è segir er in bun tip sche tut las autras regions svizras avessan dad esser fullanadas questa stad.

**A**u revoir!

\* Chatrina Josty abitescha a Köniz sper Berna e lavura sco magistra ed autura.